


ALAHADY - KAREMY 4 - TAONA A 2026



NY FINOANA AN'I KRISTY NO FAHAZAVANA VAOVAO

Ry Kristianina havana, mizotra hatrany ny DIA ary miatrika hatrany ny ADY isika, Alahady fahaefatra amin'ny karemy izao. Ary tsy ho ela dia hiara-hankalaza ny 19 marsa isika hahatsiarovantsika manokana an'i Md Josefa Ray mpitaiza an'i Jesoa daty nanombohantsika ny hasivianandro atrehintsika miaraka amin'i Masina Maria Mpanjakavavin'ny Rozery sy ireo olomasina sy olontsambatry ny nosintsika mba hitoetra eto anivon'izao tontolo izao ny

fandriampahalemana. Tsy afenina fa samy miaramavoza isika satria araka ny mahazatra fantatra ny nanombohan'ny ady fa ny fiafarany tsy fantatra. Noho izany mila vavaka sy fifadian-kanina araky ny voalazan'i Jesoa tamin'ny Apostoly ao Md Marka 9. Tsaroantsika satria modely ho antsika i Md Josefa ilay lehilahy

Vakiteny I : 1 Sam, 16, 1b, 6-7, 10-13a

Tononkira : Sal. 22,

Vakiteny II : Efez. 5, 8-14

Evanjely : Jo 9, 1 -41

marina sy tia vavaka, ho modely alaintsika tahaka amin'ny fiainantsika amin'izao karemy izao, amin'izao ADY iatrehantsika ny ratsy sy amin'izao DIANTSIKA mankany amin'ny Paka izay mitondra antsika amin'ny fitsanganan-ko velona izao, amin'ny fiainam-baovao. Tsy kisendrasendra eo anivon'ny ady sy ny dia amin'ny Paka no miatrika izao ady sy korontana be izao isika. Azo lazaina fa tena manambara ny fiainantsika tokoa izao zava-misy izao. Raha miara-maty amin'i Kristy isika dia miara-mitsangana Aminy koa. Modely ho antsika i Md Josefa ka amin'izao Alahady fahaefatra izao, anentanan'ny Eglizy ny fo amam-panahintsika mba tsy ho kivy isika fa ho feno fanantenana dia atolony antsika ity “Alahadin'ny hafaliana” ity. Alahadin'ny hafaliana satria efa mampiditra antsika amin'ny Paka na dia mbola fanentanana ihany aza. Izay ihany koa manantena sy matoky isika fa handresy izao ady izao isika, izany hoe ny ratsy fa tsy ny olona.

Ny vakiteny dia manentana antsika sahadry tokoa amin'ilay hafaliana miandry antsika raha mandresy ny ratsy isika ka tody amin'ny tena fiainam-baovao, ho zanak'Andriamanitra hiaramitsangana amin'i Kristy. Izany no anentanan'ny Eglizy antsika amin'izao Alahady fahaefatra izao. Efa akaiky tokoa ny Paka izay hanampy antsika hiombona bebe kokoa amin'i Kristy. Tsy iza moa izany fa i Kristy aina, ilay ranovelona izay nolazaintsika tamin'ny Alahady fahatelon'ny karemy sady nahatsiarovantsika an'i Md Josefa mpitaiza an'i Jesoa. Alahady namakiansika ny Evanjely manambara ny fihaonan'i Jesoa tamin'ilay vehivavy samaritana.

Androany kosa dia ny tantaran'i Jesoa nihaona tamin'ilay jamba ka nahiratra no aroson'ny Eglizy amintsika. Tahaka an'ilay jamba nahiratra isika raha mandray an'i Jesoa. Izany dia manampy antsika hahazo onona fa Izy Kristy no ilay fahazavana manilo ny fiainantsika.

Milaza miara-mahita isika fa jamban'ny fahotana maro isan-karazany isika ka tsy hitantsika ny lalan-kombana. Rehefa ao amin'i Jesoa anefa isika dia miara-mandresy Aminy, misokatra ny masontsika, ny masom-pinoantsika toy ny niainantsika tamin'ny Taon-jobily. Samy mbola mahatadidy ny hafatr'i Papa tamin'ny Birao maharitra isika. Ny fankalazana no tapitra fa ny fiainana ny fanantenana mitohy hatrany. Ny zava-misy no manosika antsika hiaina ny fanantenana. I Jesoa no ilay mibaby antsika, mandray ny fahotantsika ka ny mason'i Jesoa no hijerentsika an'izao rehetra izao. Raha mason'Andriamanitra no masontsika dia miova ny fiainantsika. Ao amin'i Jesoa izany isika ary izany no hafaliantsika. Fandalovana ho antsika toy ny miala amin'ny fahafatesana ka miditra amin'ny fiainam-baovao izany. Tahaka an'ilay jamba teo amoron-dalana tokoa isika mitalaho amin'i Jesoa mba halainy ny fahajambana manjo antsika, maro ny fahotana manajamba ny fiainantsika. Hoy Jesoa tamin'ilay jamba : “mandehana manasa ny masonao amin'ny farihin'i Siloe”. Raha isika miaraka amin'i Jesoa dia tsy ilay farihin'i Siloe no mitondra ny fahagagana fa i Jesoa ilay miantso antsika tahaka ny niantsoany an'ilay vehivavy samaritana hoe : “raha mba fantatrao ny fahasoavan'Andriamanitra”. Niditra tamin'ilay vehivavy samaritana tokoa ny fahasoavan'Andriamanitra. Miteny amintsika koa i Jesoa manao hoe : “mandehana manasa ny masonao amin'ny farihin'i Siloe”, izany hoe : “mandehana mihavana amin'Andriamanitra, mandehana mamonjy ny sakramentan'ny fibebahana”. Raha mibebaka tokoa ianao dia nahiratra. Izany no niseho tamin'ny tantara voalazan'ny Evanjely teo.

Mety misy olona misalasala, be fanontaniana, saingy anjarantsika no mijoro tahaka an'io lehilahy io feno fitokiana sy fanentren-tena dia ho afaka miova tokoa ny fiainantsika.

Manamafy izany koa ny voalazan'ireo vakiteny anankiroa izay henontsika amin'izao Alahady izao. Ny vakiteny voalohany dia mitantara ny nifidianana sy nanosoran'ny Tompo an'i Davida mpanjakan' Israely. Izany no nanirahana an'i Samoela ho any Betlehema any amin'Isaia ka tamin'izay indrindra no nisy fisalasalana teo aminy. Isika olombelona mijery ety ivelany fa Andriamanitra kosa mijery ny fontsika. Amin'izao vanim-potoan'ny karemy izao aoka ny fontsika ho fo misy an'Andriamanitra ka amin'izay atangan'Andriamantira ho zanany isika tahaka an'i Davida nohosorana. Izany no hiainantsika sahadry rehefa hosorana menaka

antsika amin'ny batemy. Ny vakiteny faharoa milaza ny vokatry ny batemy sy manazava ny tena dikan'ny batemy. Taloha isika tao anatin'ny haizina fa ankehitriny kosa ao anatin'ny fahazavana, Kristy fahazavana manilo ny fiainantsika ka tsy mandeha an-jambany intsony isika. Raha mandresy ny ratsy tahaka an'i Josefa lehilahy marina, mampanjaka ny rariny sy fahamarinana isika dia hazava ny fiainantsika. Na dia ao anatin'ny fahotana, na dia misy aza ny fanaratsian'ny olona araka ny hitantsika eo amin'ny evanjely, tsy ireny fahotana ireny no tanjona, tsy izy no nanota na ny Ray aman-dReniny fa mba hisehoan'ny asan'Andriamanitra. Isika no hiasan'ny asan'Andriamanitra raha manaiky hiala amin'ny ratsy ka notsilovin'i Jesoa (mandehana manasa ny masonao amin'ny ranon'ny siloe). Raha manasa ny masontsika amin'ny alalan'ny sakramenta, amin'ny alalan'ny fandalinantsika ny tenin'Andriamanitra isika dia fantaro àry fa hiova ny fiainantsika manontolo. Izany hoe sasao amin'ny alalan'ny finoana ; tsy ny sakramenta no manasa ny masontsika sy ny fiainantsika fa ny finoantsika. Mandray an'i Jesoa isika tahaka an'ity lehilahy jamba ity, hitantsika ny nataon'ilay jamba nanolo-tena tamin'i Jesoa izy. Miara-dalana amintsika tokoa i Jesoa, mpiara-belona amintsika. Raha manome isika, raha mahafoy mandritra ny fiainantsika manontolo fa tsy hoe indray mandeha fotsiny isika, raha manompo isika dia hahazo ny fahasoavan'Andriamanitra. Izany tokoa no anatanterahantsika ny hasim-pinoana, manome hasina ny finoantsika katolika isika mba hanomezan'ny finoana fanamasinana antsika eo amin'ny fiainantsika. Izany no niseho tamin'ny Davida (vakiteny voalohany), izany no ambaran'i Md Paoly tany Efezy : “raha mandray an'i Jesoa isika, raha manome ho an'i Jesoa isika dia hitsangan-ko velona miaraka Aminy koa. Taloha isika tao anatin'ny haizina, fa ankehitriny kosa dia ao anatin'ny fahazavan'i Kristy. Koa raha ny fahazavana no manentana antsika dia hanao soa isika, hanao ny marina ary hivelona ny tena fitiavana ka amin'izay hiombona amin'i Jesoa nitsangan-ko velona tokoa.

Ry Kristianina havana, ilay tenin'i Md Paoly no anaovako antso avo amintsika amin'izao Alahady fahaefatra izao : MIFOHAZA AZA MATORY, MITSANGANA ARY RAISO I KRISTY EO AMIN'NY FIAINANTSIKA

Ry Kristy zokinay ô, Ianao tokoa no mpiara-belona aminay. Mitantana ny fiainanay tokoa ianao, marina fa sarotra amin'izao andronay izao ny manavaka ny tena sarobidy. Maro ny zavatra mifangaro eo amin'ny fiainanay, mety tsy hahitanay ny tena lalan-kombana. Ianao no fahazavana koa sokafo ny masonay izay jamban'ny zavatra maro isan-karazany eo amin'ny fiainanay, ampio izahay hiombona Aminao bebe kokoa fa efa akaiky izao ny fankalazana ny Paka. Enga anie ho raisinay ho modely tokoa i Md Josefa ka ho lehilahy marina, ho olomarina tokoa izahay eo amin'ny fiainanay, ho olona tia vavaka amin'izay dia ho afaka handresy ny ratsy ary ho tody soa aman-tsara amin'ny Paka ka hanana fiainam-baovao ao aminao. Amen

Mompera Arseveka Mgr Benjamin Ramarason